

Agouba

Kochon Nwèl chapé

Twa kammamad té alé kyoyé on kochon on jou Nwèl. Kyoyé on kochon a pa on zafé ki dwòl ; mé kou-lasa, sé kammamad-la viv on mové moman é sé sa mwen ka rakonté-zòt jòdila ...

Mé ban-mwen ba-zòt non a sé boug-la !

Ogis sé té mèt a kochon-la. Ti Jo é Manno té vin ba'y on koudmen.

Zafé a kochon-lasa té telman dwòl ki Ogis é Ti Jo tout jouné Nwèl-lasa pa ka pé di on mo. Sé pouki sé Manno ki ka rakonté istwa-lasa ...

« Mésyézedam, wouvé zòréy a zòt pou tann sa ki rivé jou Nwèl-lasa !

Nou lèvé douvanjou, lé prèmyé kòk ka chanté kokiyoko ; nou té vie fé débouya pou nou pèsa kyoyé gwo kochon blan a konpè Ogis la.

Bèt-la té ja maré dépi lèswa-la douvan kaz-la. Pannansitan, Ti Jo té ja paré tout biten

ki fo'y. Ogis épi mwen koré mal-kochon la. Nou jété'y até fap ! Nou maré kat pat a'y, gél

a'y osi. Le konpè Ti Jo di-nou i paré, nou pòté modi bèt-la si on vyé tab. Konpè Ogis té ka

apiyé asi ren a bèt-la : mwenmenm té ka kyenbé sé kat pat maré la é dé zòréy a'y. Konpè

Ti Jo limenm té ni on kaswòl an men gòch a'y é kouto-la an men dwèt la... Le misyé

piké anba gòj a bèt-la, (an ka frisonné toupanman mwen ka di-zòt sa), kochon voyé kò a'y

anlé, i palankyé Ogis, i chalviré-mwen, gél a'y démaré é i modé Ogis kramm ! Pannan

an ka di-zòt sa konsa la, kòd kasé, kochon chapé é i mète'y ka simé san toupatou. Nou

mète-nou ka kouri dèyé'y, mé pli nou kouri, olagya ! Pli kochon ka kouri ! Onlé, bèt-la

kité savann-la owa kaz-la. I fann-kann, i chiré-bwa. Vin fé nwè. Nou limé chaltouné pou

touvé kochon, men jou lèvé si nou é nou pa jammé vwè kochon.

Mézanmi ! Zòt pé kwè sa ! Sé té on kochon-monté ! Kifé, Nwèl an nou té trisoubòlman

pas nou pa té ni ragou a vyann kochon pou nou pèsa manjé é pwadibwa an nou, ziyamm

an nou, nou pa té ni bouden nonplis. Mé pa pé, chak kochon ni sanmdi a yo. »

Yé krík !

Yé krak !

Yé mistikri !

Yé mistikra !